

Dr.sc. Omer Hamzić
Muse Čazima Čatića 18, Gračanica

LISTOVI GRAČANIČKOG KALENDARA OD 29. 10. 2009. DO 25.05. 2010

2. 12. 2009.

Održana 13. sjednica Općinskog Vijeća: odluka o cijenama toplotne energije – neprincipijelan stav vijećnika SDA

Dnevni red sjednice je ukupno sadržavao 13 tačaka, a najviše se raspravljalo o Odluci o obavljanju volonterskog rada nezaposlenih osoba visoke stručne sprema sa područja Općine Gračanica u pravnim subjektima iz javnog i privatnog sektora i o Odluci o cijenama toplotne energije, troškovima priključka na toplovod i mjerenja toplote, koju isporučuje preduzeće “Ekotoplane” d.o.o. Gračanica. Zanimljiva je bila i Informaciju o stanju i zaštiti građana od neeksplozivnih i minskoeksplozivnih sredstava na području Općine Gračanica u 2009. godini. Odluku o obavljanju volonterskog rada u principu, prihvatili su vijećnici svih stranaka, čime je potvrđeno učešće općine u programu zapošljavanja mladih osoba sa VSS u visini od cca 100.000 KM. Kada je došla na red Odluka o utvrđivanju cijena toplotne energije, vijećnike SDA, po ko zna koji put interesovala je vlasnička struktura preduzeća Eko-toplane d.o.o., te način na koji su se cijene odredi-

le i na koji će biti formirane u budućnosti. Pošto su po ko zna koji puta dobili tražene odgovore, bez ikakvih argumenata, ustvrdili su da Gračanica ima najskuplje grijanje na kantonalnom nivou, te zato, prilikom glasanja, nisu bili ni za, ni protiv ove odluke (uzdržani). Za njih očigledno, nije bilo uvjerljivo objašnjenje direktora Ekotoplane, ing. Hasana Mostarlića, koji je odgovorio da se cijene formiraju prema ukupnoj potrošnji korisnika, te da je za njeno određivanje najbitniji faktor mjerenje potrošene toplotne energije i da je stoga odluka koju treba usvojiti vijeće veoma bitna za daljnji razvoj ovog preduzeća u Gračanici. Uostalom, ovaj nivo cijena Općinsko vijeće je prihvatilo još prije 5 godina, usvajajući Studiju o zagrijavanju grada Gračanice toplotnom energijom. Na kraju je odluka i usvojena sa 16 glasova za i 8 uzdržanih. (Printtel)

10. 12. 2009.

Umro historičar Esad Tihić, koautor monografije “Gračanica i okolina u NOB-u i revoluciji”

Rođen je 1925. godine u Bosanskom Šamcu, gdje je završio osnovnu školu, a



zatim školovanje nastavio kao stipendista "Gajreta" u gimnaziji u Tuzli, odakle je, kao pripadnik skojevske đачke grupe, poslije prvog oslobođenja Tuzle, 2. 10. 1943. godine, stupio u partizanske redove. Nakon završetka Drugog svjetskog rata, nastavio je vojnu karijeru, koju je okončao u činu pukovnika JNA. U međuvremenu, završio je Filozofski fakultet, Odsjek za istoriju u Beogradu. U činu pukovnika JNA, više od 20 godina radio je u Vojnoizdavačkom zavodu u Beogradu, pretežno na pripremi i izdavanju djela iz istorije narodnooslobodilačkog rata, najviše edicija značajnijih partizanskih jedinica. Kao vojni penziner, 1990. godine, trajno je preselio iz Beograda u Sarajevo, gdje je čitavo vrijeme rata dijelio sudbinu žitelja opkoljenog Sarajeva.

Bio je sjajan redaktor i urednik više od 30 knjiga i monografija, član mnogih redakcija i redakcionih odbora za brojne historijske monografije i druge izdavačke projekte. Autor je većeg broja historiografskih radova, te nekoliko knjiga, od kojih

izdvajamo: "Posavsko-trebavski narodnooslobodilački odred (1983.), "Gračanica u NOB-u i revoluciji" (u koautorstvu sa Omerom Hamzićem, 1988.), Gradačac od 1941. do 1945. (2008.), "Modriča i okolina u vrijeme narodnooslobodilačkog rata (u ediciji "Modriča sa okolinom u prošlosti"), "Borbeni put 21. istočno-bosanske (Tuzlanske) brigade" (u istoimenoj monografiji), "Dejstva jedinica NOV i POJ u brčanskom kraju od kraja 1942. do aprila 1945." (u ediciji "Brčko u radničkom pokretu i NOB-i"). Kao član Redakcije, objavio je više priloga u ediciji "Tuzla u radničkom pokretu i revoluciji" (tri knjige o događajima u Tuzli i okolini od 1918. do 1945. godine), radio je na "Tuzlanskom vremeplovu" sa Dragišom Trifkovićem itd. Kao istraživač i naučni radnik, a posebno kao redaktor mnogih rukopisa, knjiga i edicija, ispoljavao je nevjerovatnu upornost na prikupljanju i kritici historijskih izvora, posebno usmenih kazivanja, opterećenih subjektivnošću, nervirao ga je uopšten govor, opterećen frazama...

Istražujući i radeći na monografiji "Gračanica i okolina u NOB-u i revoluciji" zajedno sa Omerom Hamzićem, u periodu od 1985. do 1988. godine, stekao je u Gračanici brojne prijatelje i poštovaoce, zavolio je Gračanicu u kojoj se osjećao kao u svom rodnom Šamcu. Bio je saradnik Časopisa "Gračanički glasnik" u kojem je objavio opširniju studiju o osnivanju i razvoju DOMDO pukovnije Muhamedage Hadžiefendića pod naslovom "Jedinice Domobranske dobrovoljačke pukovnije (DOMDO) na teritoriji Trebave, Ratiša i Posavine" (br. 2, str. 32 – 59, 1996.). Poslije rata bio je jedan od organizatora Naučnog skupa o prošlosti Bosanskog Šamca, sa kojeg je objavio i uredio zbornik radova ("Bosanski Šamac kroz historiju").

Kao plemenit i blag čovjek, vedrog duha i optimizma, bio je omiljen u društvu, na druženjima i sijelima. Njegovi najbliži prijatelji, dali su mu nadimak "Tica".

Za učešće u antifašističkoj borbi i svoj višedecenijski rad dobio je brojna visoka priznanja, nekoliko ordena, među kojima se ističe Orden Republike sa srebrnim vijencem.

Umro je 10. 12. 2009., a ukopan dva dana kasnije u rodnom Bosanskom Šamcu.

11. 12. 2009.

Naučni skup: Tešanjski prostor u prošlosti (U povodu 450 godina vakufa Gazi Ferhat-bega)

Ovaj dvodnevni naučni skup u organizaciji Centra za kulturu i obrazovanje Tešanj bio je centralni događaj u povodu općinskog praznika 10. decembra–Dana grada Tešnja. Na skupu je sa zapaženim saopštenjima nastupilo dvadesetak stručnjaka iz oblasti historije, etnologije, zaštite kulturno-historijskih spomenika i drugih disciplina, među kojima i tri saradnika "Gračaničkog glasnika": Edin Šaković, dr. Omer Hamzić i mr. Rusmir Djedović. Navodimo imena i ostalih učesnika: Dr. Edin Mutapčić, Mr. Aladin Husić, Dr. Mirza Hasan Ćeman, Dr. Almir Fatić, Mr. Fuad Omerbašić, Milo Jukić, Salkan Užičanin, Dr. Galib Šljivo, Mr. Momčilo Spasojević, Dr. Adnan Kadrić, Dr. Ismet Bušatlić, Dr. Azem Kožar, Dr. Dželal Ibraković, Mina Kujović, Mr. Momčilo Spasojević, Alija Galijašević, Ismet Avdić, Husein Galijašević, Melida Travančić, Vojislav Vujanović, Miralem Brkić, Suad Huskić i Atif Kujundžić.

24. 12. 2009.

Izbor sportiste godine 2009. – najuspješniji rukometaš Husein Salkić i karatašica Selma Grbić

Za najuspješnijeg sportskog radnika proglašen je Nermin Šaković, najuspješniji trener je Mirsad Gopo, trener Rukometnog kluba "Gračanica indeks". U kategoriji mladih sportista jedini je priznanje dobio Adnan Hadžić iz Biciklističkog kluba "Gračanica". Najuspješniji sportista-invalid je Hasib Salkanović, jedan od najboljih

košarkaša u kolicima u Bosni i Hercegovini. U konkurenciji sportskih klubova, u ženskoj konkurenciji najuspješniji je Ženski odbojkaški klub "Gračanica", a u muškoj–Rukometni klub "Gračanica indeks" (muškarci). Sportista općine Gračanica za 2009. godinu je Husein Salkić, rukometaš RK "Gračanica indeks", a najuspješnija sportašica Selma Grbić, karatašica Karate kluba "Gračanica" Posebno priznanje za razvoj omladinskog sporta dobila je Škola nogometa NK "Jedinstvo" Lukavica, a posebno priznanje općini Gračanica dodijelio je Biciklistički savez Bosne i Hercegovine za organizaciju Biciklističke brdske trke "Gračanica 209."

Iz pozdravnog govora općinskog načelnika Nusreta Helića na ovom skupu izdvajamo sljedeću rečenicu: "U ovakvim prigodama, možda se najbolje vidi zakonska nedefinisanost i, nažalost, nemogućnost adekvatne materijalne podrške uložnim naporima, naspram velikih rezultata koje ostvaruje naša mladost."

28. 12. 2009

14. sjednica Općinskog vijeća: Budžet, Odluka o volonterskom radu i Strategija za mlade Općine Gračanica glavne teme

Zadnja sjednica Općinskog Vijeća (OV) u 2009. godini prošla je u žustroj raspravi o Budžetu Općine Gračanica za 2010. i rebalansu budžeta za 2009. godinu. Rebalansirani budžet za 2009. godinu predviđen je u iznosu od 12.244.000 KM, što je za 340.000 KM manje u odnosu na ranije usvojeni budžet. Budžet za 2010. utvrđen je u iznosu od 11.097.000 KM. Pored Budžeta, najveću pažnju vijećnika zaoкупila je Odluka o izmjenama i dopunama Odluke o volonterskom radu, te Nacrt strategije za mlade Općine Gračanica. Između ostalog, na sjednici se vodila rasprava i o drugim, za Gračanicu, važnim dokumentima kao što su: Nacrt odluke o usvajanju i provođenju Regulacionog plana "Radna zona II Gračanica", Program rada općinskog načelnika za 2010. godinu i Program

rada Općinskog Vijeća za 2010. godinu. Bitno je napomenuti da su vijećnici SDA, nakon obavljene rasprave o amandmanima na prijedlog Budžeta napustili sjednicu u znak protesta što njihovi amandmani nisu prihvaćeni i usput javno poručili svojim kolegama da će razmisliti o daljnjem radu u ovakvom sazivu Općinskog Vijeća.

26. 01. 2010.

Izgrađena nova zgrada općine i otvoren Centar za pružanje usluga građanima ili "nova općina"

Prigodnoj svečanosti tim povodom prisustvovali su ambasador Holandije Sweder van Voorst (Sveder van Vorst), Ambasador Švedske Bosse Hedberg (Boze Hedberg), zatim direktor USAID-a u BiH Allan Reed (Alan Rid), te neki ministri u Vladi TK, predstavnici GAP-a iz Tuzle i Sarajeva, načelnici susjednih općina i istaknuti građanički privrednici i predstavnici javnih preduzeća i ustanova.

Centar za pružanje usluga građanima u okviru općinske uprave u Gračanici – otvoren je u prizemlju novoizgrađenog modernog objekta, kojeg su građani popularno nazvali nova Općina. Na mjestu novoizgrađenog objekta bile su stare ruševne zgrade koje su predstavljale ruglo i više nisu mogle služiti potrebama općinske uprave.

Snažan poticaj ovoj investiciji dali su nosioci Projekta upravne odgovornosti GAP. Objekat je izgrađen i opremljen u rekordnom roku, za nepunih šest mjeseci. U građevinski dio uloženo je blizu 800.000 KM. Sredstva su obezbijedena prodajom nekretnina u vlasništvu Općine koje se nisu koristile i koje su uglavnom propdale. Radi se o objektu ukupne površine od 1.554,88 m² (podrum od 131,7 m², prize-



mlje površine 486 m², sprat površine 463,8 m² i potkrovlje od 473,37 m²). U prizemlju je smješten i instaliran Centar za pružanje usluga građanima, u drugoj fazi, na spratu opremit će se administrativno-kancelarijski prostor i multimedijalna sala, te radni prostor za normalno funkcionisanje Općinskog vijeća.

Uz pomoć GAP-a koji je finansirao i instalirao informatičku opremu u vrijednosti od 210.000 KM, izvršena je obuka i edukacija osoblja koje je osposobljeno da pruži novi i bolji kvalitet usluga građanima.

Pored unapređenja i poboljšanja kvaliteta usluga građanima, realizacijom ovog projekta stvoreni su preduslovi za temeljnu rekonstrukciju stare općinske zgradeve ("šarene kuće" ili konaka), koja je proglašena nacionalnim spomenkom.

27. 1. 2010.

15. sjednica Općinskog vijeća: javna rasvjeta top-tema sjednice

Odluka o javnoj rasvjeti, Odluka o komunalnim taksama i Nacrt Odluke o izmjenama i dopunama Odluke o nazivima ulica (u nacrtu) su tačke dnevnog reda koje su izazvale najveću pažnju vijećnika. Raspravljalo se i o Odluci o kriterijima za raspodjelu sredstava planiranih za rad mjesnih zajednica i sredstava za održavanje puteva, Odluci o visini naknade pred-

sjedniku i članovima općinske izborne komisije, davanju saglasnosti na imenovanje direktora Centra za socijalni rad, izvještaju o radu Općinskog Vijeća i Općinskog Načelnika, te nekoliko drugih informacija i izvještaja.

26. 2. 2010.

16. sjednica Općinskog vijeća: u centru pažnje izvršenje Budžeta za 2009. i imenovanje članova upravnih odbora javnih zdravstvenih ustanova

Tokom prošle godine izvršena su dva rebalansa Budžeta, koji su bili posljedica neravnomjernog priliva sredstava i opće ekonomske krize. Ukupno ostvareni prihodi u 2009. godini iznose 9.388.355 KM, što je za 192.643 KM, odnosno 2,01% manje od planiranih prihoda, a 16,52% manje u odnosu na prethodnu godinu. U strukturi Budžeta porezni prihodi čine 69,46%, neporezni 19,23 i tekuće potpore (grantovi) 11,31%. Realizovani su ključni projekti, uredno servisirani dugovi i ranije stvorene obaveze (po kreditima), te obezbijedeno normalno funkcionisanje općinskih organa uprave. Većinom glasova, Općinsko vijeće prihvatilo je Izvještaj o izvršenju Budžeta za 2009. godinu. Isto tako prihvaćen je izvještaj o utrošku budžetske rezerve za prošlu godinu iz kojeg se vidi da je ova budžetska stavka realizovana u iznosu od 69.441 KM, što je gotovo u nivou plana. Od značajnijih odluka, Vijeće je usvojilo i sljedeće: Odluku o javnim i ostalim parkiralištima na području općine Gračanica, Odluku o davanju saglasnosti za prijenos prava raspolaganja bez naknade i Odluku o promjeni statusa nepokretnosti u opštoj upotrebi.

Uz konstataciju da je prethodna procedura provedena transparentno i u skladu sa zakonom, većinom glasova usvojena su rješenja o imenovanju upravnih odbora JZU u Gračanici. Gradska apoteka, Dom zdravlja i Opća bolnica. Vijeću je prezentirana i Studija upravljanja čvrstim otpadom na području općine, koja, nažalost,

nije izazvala veću pažnju vijećnika, iako taj dokument opominje i upozorava da bi se Gračanica mogla uskoro suočiti sa najvećim ekološkim problemom u svojoj historiji – jer se postojeća gradska deponija za tri godine mora zatvoriti, a nove nema ni u zamislama – ukoliko se odmah ne počnu tražiti rješenja, od kojih su neka jednim dijelom razrađena u Studiji, koju je, inače, finansirala ASF, a radila sarajevska konzultantska kuća “Bosna S”.

Više pažnje vijećnici su posvetili pitanjima sigurnosti na općini, a povod je bila redovna informacija Policijske stanice Gračanica, dok su sljedeće tačke: Izvještaj o procjeni štete od prirodne nesreće koja je uzrokovala pojavu poplava i klizišta i informacije o izradi elaborata o stanju javne rasvjete, o realizaciji odluke o obavljanju volonterskog rada i o rješavanju upravnih premeta u službama za upravu – prošle takoreći bez rasprave.

9. 3. 2010.

Umrla Katarina – Katica Ivanišević (rođ. Rimar), jedna od najvećih humanitarki Gračanice

Odavno Gračanica nije imala tužniji ispraćaj nekog od svojih sugrađana na vječni počinak. Teta Katica je skoro šest decenija bila sinonim silne ljudske dobrote, humanosti, požrtvovanosti, ljubavi prema čovjeku – one iskrene, bez ostatka. Rođena je 1929. godine u jednom selu u blizini Vukovara. Po završetku škole za akušerke-babice došla je u Gračanicu daleke 1951. godine i zaposlila se u građaničkom Domu zdravlja, gdje je dočekala i penziju u koju je samo formalno otišla. To je žena koja je skoro do zadnjeg dana ostala u svojoj službi, u službi čovjeka, na svom svetom zadatku. U teškim godinama poslije Drugog svjetskog rata aktivno je učestvovala u širokim akcijama na suzbijanju raznih epidemija i zaraza na tadašnjem građaničkom srezu, danima je radila na terenu, noćivala po seoskim kućama, dijeleći siromaštvo i sudbinu običnih ljudi. Sudjelovala

je u mnogim akcijama, takozvanog sanitarnog poučavanja i prosvjećivanja našeg sela, obučavala buduće majke i žene, bila je omiljena u kolektivu i među kolegama na poslu i pacijentima za koje je uvijek imala toplu riječ utjehe i puno razumijevanje. To je žena koja nije imala slobodnog vremena, pomoć drugome, rad za dobro drugog – to je bio njen život. Nikada nije prihvatala za svoj nesebičan rad nikakvu nagradu, odbijala je čak i simboličan poklon za uspomenu. Ono što je i kako je radila ta žena ionako se ničim nije moglo platiti. Porodila je mnoge žene u Gračanici, mnogima dječacima i djevojčicama, sada odraslim građanima i građankama Gračanice ona je baka, ona ih je prva dočekivala na svijet, kupala i oblačila, učila mlade majke kako da postupaju u prvim danima trudnoće i poroda... Iza tete Katice, u velikoj žalosti, ostao je suprug Todor – Tošo, kćerka Snježana, sestra Romana i mnogobrojna druga rodbina i prijatelji. Ispraćaj tete Katice na vječni počinak, u prisustvu mnogobrojnih Gračanlija, obavljen je 10. 3. 2010.. godine. Istog dana sahranjena je na Novom gradskom groblju u Banja Luci.

18. 3. 2010.

Otvoren Tržni centar “Zeka komerc” u Gračanici

Radi se o još jednom tržnom centru na južnom ulazu u Gračanicu, površine od oko 6 hiljada kvadratnih metara, u koji je uloženo blizu 4 miliona KM. U tom specijalizovanom centru mušterije će posluživati blizu 100 radnika, od čega 40 novouposlenih. U vremenu teške depresije, privrednog opadanja i recesije, kako je rečeno na skromnoj svečanosti, otvaranje ovog objekta budi neke znake optimizma i pozitivne energije iz ovoga grada.

18. 3. 2010.

Otvoren ured “Evropskog pokreta u BiH” za TK u Gračanici: pohvalne riječi Općinskog načelnika

U prisustvu ambasadora Austrije u BiH dr. Donatusa Köcka, predstavnika općine i

predstavnika drugih nevladinih organizacija, te većeg broja građana, na simboličan način i uz skromnu svečanost, u Gračanici je otvoren otvoren ured “Evropskog pokreta” za TK (upravna zgrada nekadašnje “Ozrenke” u centru grada). Na svečanosti su govorili potpredsjednik “Evropskog pokreta” gosp. Dino Čolić i generalni sekretar te ugledne organizacije Predrag Praštalo i iskazali zahvalnost općini Gračаница, koja je prva podržala ovu organizaciju i prepoznala njenu ulogu i značaj kako za lokalnu zajednicu, tako i za BiH. “Otvaranjem regionalnog ureda “Evropskog pokreta” u Gračanici stvoreni su uslovi za još kvalitetniji rad te organizacije i ostvarivanje njene misije na ovoj regiji”, rekao je načelnik općine Gračаница Nusret Helić. Ambasador Austrije u BiH, obećao je da će njegova zemlja i dalje podržavati “Evropski pokret” i sve akcije te organizacije, koje se planiraju u narednom periodu.

19. 3. 2010.

Hajrija Bećirović, priznanje Društva pisaca TK

Na svečanosti povodom dodjele godišnje nagrade Društva pisaca TK, koju je dobio Zejćir Hasić, književnik iz Brčkog za dječju knjigu “Hajde da opet šutimo”, dodijeljeno je i nekoliko posebnih priznanja istaknutim književnim imenima s područja TK. Među njima je i književnik iz Gračanice, Hajrija Bećirović, koji je dobio priznanje “za život posvećen poeziji”. Svako ko makar malo poznaje stvaralaštvo ovog gračaničkog književnika i njegov životni put, bukvalno ispunjen poezijom, složit će se sa konstatacijom da je ovo visoko priznanje došlo u prave ruke.

25. 3. 2010.

Nakon dodjele koncesije “Eko toplanama” – od Gračanlija zavisí kojom će brzinom nestajati smoga iznad Gračanice

Vlada Tuzlanskog kantona donijela je odluku o dodjeli koncesije za realizaciju projekta snabdijevanja Gračanice toplotnom energijom. Koncesija je dodijeljena



privrednom društvu “Eko-toplane” d.o.o. Gračanica na period od 30 godina. Time je označen kraj izuzetno komplikovanog procesa formalno-pravnog utemeljenja ove velike komunalne investicije u Gračanici i ekološkog projekta, čiji značaj će se moći objektivno procjenjivati tek u vremenu koje je pred nama. Radi se o najvećem stranom ulaganju u lokalnu komunalnu infrastrukturu ovoga grada otkako on postoji, u iznosu od 15 miliona KM, koju su svaki na svoj način, podržali domaći faktori: općina Gračanica, Vlada TK i jednim dijelom Vlada Federacije BiH.

Magistralni toplovod, od “Kovačnice Šakovića” (raskršće za Ritašiće) već “kreće” prema centru grada i naseljima Bazen i Čiriš. Kojom će brzinom i tempom nestajati smoga iznad Gračanice, zavisit će od zainteresovanost svakog domaćinstva u Gračanici, svake institucije i privrednog subjekta, stambenog naselja i svakog građanina ovoga grada. Sve je do nas...

30. 3. 2010.

17. sjednica Općinskog vijeća: glavne teme – Plan kapitalnih ulaganja i imena novih ulica u Gračanici

Plan kapitalnih investicija Općine Gračanica za period 2010. – 2014. predstavlja dokument koji za naredne četiri godine definira prioritete po kojima će se vršiti investiranje u kapitalne projekte. Lista projekata urađena je na osnovu unaprijed određenih kriterija kao što su broj građana koji će imati koristi od projekta, broj ukupnog stanovništva itd. Na kraju rasprave ovaj dokument je, uz neke inicijative, jednoglasno usvojen.

Odluka o izmjenama i dopunama Odluke o nazivima ulica, kojom se imenuje 18 novih i promjena dosadašnjih naziva za 5 ulica, po prijedlogu posebne stručne Komisije, koju je imenovao općinski načelnik, i tokom javne rasprave i u pripremi ove sjednice, bila je predmet prizemne politizacije i šansa za ubiranje jeftinih političkih poena kod boračke populacije, pogodna tema za šuplju patriotsku retoriku i prodaju magle” širokim narodnim masama. Iako je strpljivo pripremana, sa vrlo čvrstim stručnim argumentima i principijelnim stavovima predlagачa, odluka je ipak jedva dobila podršku 16 “ruku” (što je nezaslužen minimalac). Usvojena je, dakle, sa 16 glasova “za”, 10 “protiv” (SDA), te dva suzdržana vijećnika. (Odluku sa obrazloženjima donosimo u rubrici “Zavičaj”) u ovom broju našeg časopisa)

Pored navedenih tema, vijećnici su razmatrali i usvojili sljedeće dokumente: Strategija za mlade Općine Gračanica, Odluka o usvajanju i provođenju Regulacionog plana “Radna zona II” Gračanica, Odluka o utvrđivanju prosječne konačne cijene i prosječne konačne cijene m² korisne stambene površine na području Općine Gračanica, Odluka o utvrđivanju visine naknade za pogodnost gradskog građevinskog zemljišta, Plan za unapređenje inkluzivnog obrazovanja na području Općine Gračanica, Izvještaj o radu i finansijskom poslovanju JU “BKC”-a Gračanica za 2009. godinu, Izvještaj o radu i finansijskom poslovanju JU Centar za socijalni rad Gra-

čanica za 2009. godinu, Izvještaj o radu i finansijskom poslovanju JU Veterinarska stanica Gračanica za 2009. godinu, Inicijativa o osnivanju kantonalnog doma zdravlja, Inicijativa o dopuni zakona o porezu na promet nepokretnosti i prava, Plan upisa učenika u prvi razred Mješovite srednje škole Gračanica, Plan upisa učenika u prvi razred Gimnazije Dr. Mustafa Kamarić, te kao zadnja tačka Rješenja i zaključci imovinsko-pravne službe.

7. 4. 2010.

Oduvijek se ovdje dolazilo “da se sviđaju neki poslovi”, ali i da se viđaju neki dobri ljudi. Gračanica od posla čaršija – organizator prvog Međunarodnog sajma poduzetništva “Graposexpo” 2010: 222 domaća i strana izlagača, 12.000 posjetilaca – uspješan nastup gračaničkih privrednika, “pet plus” za Gračanicu i “Gračaničku kuću” kao najbolji eksponat Sajma, sastavljen isključivo od proizvoda gračaničkih firmi;

Organizatori sajma–Općina Gračanica, Udruženje poslodavaca i samostalnih privrednika Gračanica, Obrtnička komora Tuzla i kompanija “BOMSexpo” (kao neposredni organizator i nosilac posla), te Klaster plastičara i alatničara Gračanica i GTZ kao partneri projekta imaju ra-

zloga za zadovoljstvo. U ovom slučaju nije izostala pomoć i konkretna podrška resornih ministarstava Vlade Federacije BiH i Tuzlanskog kantona. Sve je funkcionisalo besprijekorno, od ulazne kapije, uređenja štandova, do pres centra i pratećih sadržaja i manifestacija. Pohvale za organizaciju sajma, od izbora lokacije i uređenja sajmišta u trgovačkoj zoni na glavnom južnom ulazu u Gračanicu, do najsitnijih detalja i opće atmosfere tokom 4 sajamska dana–stizale su i od onih koji su na ovaj poprilično riskantan potez lokalne vlasti u Gračnici gledali sa ne malom dozom rezerve i skepse. I prije recesije, mnoge slične priredbe su propale, u recesiji pogotovo...

U ovom slučaju Gračanica je (u “kompletu”: lokalna vlast, poduzetnici, gađani) nadmašila sebe. Prvi i najteži ispit organizatori su vrlo uspješno položili. Postavljeni su vrlo visoki standardi i kriteriji. Sljedeće godine ili u pripremi sljedećeg sajma moraju se ne samo održati, već dalje unapređivati.

Sajam su uz domaćina–općinskog načelnika Nusreta Helića, nakon prigodnog obraćanja, simboličnim presijecanjem vrpce, otvorili Visoki predstavnik EU u Bosni i Hercegovini Valentin Incko, predsjednik Vlade TK Enes Mujić i ministar



obrta i poduzetništva u Vladi FBiH Velimir Kunić. U ime privrednika Gračanice, goste Sajma i izlagače pozdravio je i predsjednik građevinske kompanije "Širbegović", inženjer Faruk Širbegović.

Osim spomenutih, svojim prisustvom, svečano otvaranje Sajma uveličali su i sljedeći visoki gosti: potpredsjednica Federacije BiH, Spomenku Mičić, predsjednik i potpredsjednik Skupštine TK Amir Fazlić i Tomo Vidović, ministri u Vladi FBiH i Vladi TK, gradonačelnik bratskog grada Flori Lezobre u Fancuskoj Pjer Buše, diplomatski i konzularni predstavnici Mađarske i Francuske, predstavnici općina Senta, Beli Manastir i Županja, načelnici susjednih i više drugih općina u BiH i dr.

Govoreći o značaju ove privredne manifestacije, u svom prigodnom obraćanju, općinski načelnik je, između ostalog, rekao: "Ulazeći u projekat organizovanja Sajma poduzetništva, mi jesmo pošli od tradicije, ali s pogledom u budućnost – tražeći odgovor na pitanje – kako dalje. U Gračanici se ne dešava ništa slučajno, pa ni ovaj Međunarodni sajam poduzetništva i obrta: htjeli smo, prije svega, promovisati privredni potencijal i poduzetnički duh Gračanice, htjeli smo da pokažemo da sintagma "Gračanica grad biznisa i poduzetništava" ili "Od posla čaršija" nije priča bez pokrića i bez osnova. Mnogo puta potvrdilo se da u ekonomiji i kriza može biti izazov i šansa za one koji su spremni uhvatiti se u koštac sa tim izazovima. Tu negdje leži i odgovor na pitanje koje se u danima prije održavanja sajma tu i tamo postavljalo i u samoj Gračanici. Kome je to do sajma, kada su mnogi sajmovi već propali. Kao odgovor moglo bi biti pitanje: Zašto to mora da se desi i Gračanici?"

Nakon otvaranja, uslijedio je vrlo dinamičan ritam sajma: rekordna posjeta, mnogo sklopljenog posla, prateći događaji i manifestacije, konferencije i sesije, modne revije (poseban doprinos dala Sedada Delić, modna kreatorka iz Gračanice),

kulturno-zabavne manifestacije na sajmu i u BKC u gradu, druženja i sve ono što čini takozvani sajamski "kolorit" i što je na neki način oplemenilo čitavu organizaciju...

Poznato je – u Gračanici ne može biti ni minute praznog hoda. Pored izlagačkog dijela, dakle, paralelno sa ostalim aktivnostima, odvijala se Tematska konferencija Sajma pod generalnim naslovom "Poduzetništvo i konkurentnost", koja se tokom trajanja sajma realizovala u 8 solidno pripremljenih i posjećenih sesija. Organizovan je i Okrugli sto "Tradicionalna zanatstva umijeća u Bosni i Hercegovini" kao prateći sadržaj uz sajamsku izložbu tradicionalnih zanata. Na ovim skupovima prezentirani su, prije svega primjeri dobre prakse i odaslane važne poruke za unapređenje mnogih privrednih grana u Bosni i Hercegovini, počevši od metalurgije, energetike i drvoprerađivačke, pa do poljoprivrede i kućne radinosti.

Sve u svemu, tokom trajanja sajma – od 7. do 10. aprila, Gračanica je bila centar poduzetništva i biznisa u našoj zemlji, domaćin mnogim visokim gostima, privrednicima i stručnjacima iz Bosne i Hercegovine i iz inostranstva i još jednom se promovisala kao mjesto u kojem se dešavaju i neke pozitivne stvari u ovoj zemlji. Iz Gračanice "od posla čaršije" tokom trajanja i nakon završetka Sajma otišla je u svijet slika neke bolje i drugačije Bosne i Hercegovine. Oduvijek se ovdje dolazilo "da se sviđaju neki poslovi", ali i da se viđaju neki dobri ljudi. Gračanica od posla čaršija.

7. 4. 2010.

Međunarodni sajam poduzetništva "Graposexpo" Gračanica: Tematska konferencija "Poduzetništvo i konkurentnost" – dobar spoj savremene teorije i dobre prakse

Pored izlagačkog dijela, paralelno sa ostalim aktivnostima, odvijala se Tematska konferencija Sajma pod generalnim naslovom "Poduzetništvo i konkurentnost" koja se tokom trajanja sajma odvi-

jala u 8 solidno pripremljenih i posjećenih sesija. U koncipiranju i organizaciji Konferencije poseban doprinos dao je inženjer Sead Jahić, sa svojom firmom "Idea CO" iz Gračanice.

Konferencija je otvorena 7. 4. 2010. uvodnim izlaganjima prof. dr. Nikole Grabovca ("Uticaj recesije na mala i srednja preduzeća") i prof. dr. Mirze Kušljugića (Najava i ciljevi konferencije "Poduzetništvo i konkurentnost"). Kao primjeri dobre prakse predstavljeni su rezultati Regionalne razvojne agencije "Nerda" i "Credo" projekta, zatim je uslijedilo predstavljanje Fondacije za održivi razvoj/razvitak OdRaz (direktor Fondacije Safet Daut i predsjednik Upravnog odbora Fondacije Vjekoslav Bevanda), projekata podrške razvoju lokalnih zajednica i Projekta poboljšanja pristupa malih i srednjih preduzeća finansijskim sredstvima – EAF SME (projekat Vlade Federacija Bosne i Hercegovine i Svjetske banke).

Za prva sesiju pod naslovom "Metaloprerađivačke šanse i prijetnje" uvodničar je bio Seid Zulić, direktor Instituta za zavarivanje, predsjednik Regionalnog odbora za metaloprerađivačku industriju, a kao primjeri dobre prakse predstavljeni su rezultati Centra za robotiku Sarajevo, Instituta za zavarivanje Tuzla (Magdeburg) i uspješne kompanije iz oblasti metaloprerađivačke: GMT Konstrukcije Gračanica i Metalno Zenica;

Drugog dana Sajma održane su četiri sesije i to po redu: druga – "Napredne tehnologije u oblasti prerade plastike i alatničarstva" (uvodničar je bio mr. Fuad Ćurčić, a primjeri dobre prakse: KPA Gračanica, MTTC BiH, "Helioplast"), treća – "Alternativni izvori energije" (uvodničar: prof. dr. Mehmed Behmen i saradnici, primjeri dobre prakse iz "Eko toplana" Gračanica i "Eko energije" – decentralizirana isporuka energije, četvrta – "Energetska efikasnost u industriji" (uvodničar: prof. dr. Mirza Kušljugić – CREDO, dobra praksa:

Esad Smajlović (GAP) "Energetski pregled zgrada u BiH", Lena Bratić, Centar za energetska efikasnost (CEEFF) Sarajevo) i EBRD – tehnička podrška i podsticajni bonus), peta – "Od inovacije do proizvoda" (uvodničar: prof. dr. Ante Mišković, savjetnik Ministra obnove i razvoja FBiH, primjeri dobre prakse: udruženja inovatora FBiH, Udruženje inovatora TK i Udruženje "Narodna tehnika BiH", Sarajevo);

Trećeg dana sajma održana je šesta i sedma sesija Konferencije. Za šestu sesiju pod naslovom "Šta su sistemi kvaliteta donijeli organizacijama" uvodničari su bili: dr. sc. Sabahudin Jašarević i Sead Jažić (Tim Know how – CE Označavanje), a primjeri dobre prakse BAS program BiH. Za sedmu sesiju pod naslovom "Drvoprerađivačke konkurentnost uslovi za izvoz", uvodničari su bili: dr. sc. Ismar Alagić i Sanjin Konjhodžić, predstavnik SGS Švicarska, a primjeri dobre prakse Centar izvrsnosti za drvo "Arteco" Tešanj i ISO WOOD Gračanica;

Osma i posljednja sesija ove Konferencije, organizovana je četvrtog dana Sajma, 10. 4. 2010., pod naslovom "Poljoprivreda i prehrambena industrija", a uvodničari su bili prof. dr. Midhat Jašić ("Autohtoni prehrambeni proizvod u BiH i mogućnosti njihove zaštite") i prof. dr. Meho Bašić ("Najvažniji EU standardi i tipovi certifi-



Sead Jahić: detalj sa konferencije Sajma

kacije u poljoprivredi i prehrambenoj industriji”). Kao primjer dobre prakse prezentiran je Portal za poljoprivredu BiH – “Agrolink” Banja Luka. Nakon ove sesije organizovano je Druženje poljoprivrednika i proizvođača hrane u organizaciji Udruženja poljoprivrednika Gračanica.

Iz pregleda sadržaja i učesnika Konferencije može se zaključiti koliko su bile široko zahvaćene mnoge aktuelne teme iz oblasti privrednog života u našoj zemlji. Dominirala su konkretna pozitivna iskustva (“dobra praksa”) iz pojedinih organizacija i privrednih subjekata, kao i važne poruke za unapređenje gospodarstva u našoj zemlji. Bilo bi dobro da bar nešto od toga dođe do onih koji kreiraju privredni ambijent u Bosni i Hercegovini. Bez obzira što se na prvi pogled može učiniti da je “prenatrpna” vrlo šarolikim i različitim temama, Konferencija je dala bitno obilježje ovom Sajmu i ozbiljnost čitave manifestacije podigla na jedan zavidan nivo. Kroz Konferenciju je “prodefilovalo” više vrlo uglednih stručnjaka, ali i dosta takozvanih praktičara, koji su ponijeli izuzetno pozitivne utiske kako sa Sajma, tako i iz Gračanice.

8. 4. 2010.

Međunarodni sajam poduzetništva

“Graposexpo” Gračanica: Okrugli sto

“Tradicionalna zanatska umijeća u Bosni i Hercegovini”

Izložba starih tradicionalnih zanata, iako svrstana u prateće sadržaje Sajma, privukla je pažnju posjetilaca izvan svih očekivanja i tako se sama po sebi nametnula kao važan segment čitave ove privredne manifestacije. Ova izložba na najbolji način potvrdila je opravdanost nastojanja Obrtničke komore TK da prezentira stare zanate, ne samo kao kulturnu baštinu, već i kao djelatnost od koje se može živjeti. U organizaciji ove izložbe, poseban doprinos dao je Avdo Hadžiavić, sekretar Obrtničke komore Tuzlanskog kantona, koji je okupio zavidan broj izlagača, među kojima su,

svakako, prednjačile članice Udruženja “Gračaničko keranje”, gračanička grnčarija, minijature u drvetu, tkanje itd.

Kao sastavni dio ove izložbe, u organizaciji Udruženja “Gačaničko keranje” (koje predvodi Azemina Ahmedbegović) i dva udruženja iz Sarajeva (“Zona unaprijeđenog poslovanja Baščaršije” i Asocijacija za interkulturalne aktivnosti i spašavanje naslijeđa u BiH) održan je Okrugli sto na temu *“Tradicionalna zanatska umijeća u Bosni i Hercegovini” s ciljem da se doprinese “repozicioniranju zanata kroz saradnju zanatlija, resornih institucija, nauke i lokalne zajednice”*. Uvodno izlaganje na Okruglom stolu podnijele su: Svetlana Bajić, muzejski savjetnik, na dužnosti načelnika Etnološkog odjeljenja Zemaljskog muzeja i Marica Filipović, također muzejski savjetnik, na dužnosti pomoćnika direktora Zemaljskog muzeja Sarajevo. Moderator Okruglog stola bila je Mevlida Serdarević, doskorašnja direktorica Muzeja grada Sarajeva, predsjednica spomenute Asocijacije. U drugom dijelu ovog skupa prisutnima su prezentirane osnovne informacije o vrijednostima i potrebi repozicioniranja starih zanatskih umijeća i “dobra praksa” na stvaranju Baščaršijskog brenda “Zanatlije Baščaršije” (prezentirao Nihad Halvo, zanatlija, sekretar Udruženja “Zona unaprijeđenog poslovanja Baščaršija”) i aktivnostima na zaštiti “Gračaničkih kera” kao geografskog pojma (prezentirala Azemina Ahmedbegović, predsjednica Udruženja “Gračaničko keranje”).

Na ovom okruglom stolu govorili su i gosti iz Etnološkog muzeja iz Beograda i Kumrovcu, a prezentirana je i izložba “Zanatlije – čuvari tradicije Baščaršije”.

Budući da je ovaj Okrugli sto naknadno, a i dosta kasno uključen u program Sajma (što nije propust organizatora), za njegovu održavanje, objektivno se nisu mogle izvršiti sve potrebne pripreme, pa iako je praćen od strane medija i zainteresovane publike, prošao je ipak na margini, ra-

nije najavljenih i pripremljenih sajamskih sadržaja. Njegove poruke su, međutim, izuzetno važne za dalji razvoj starog zanatstva, kao djelatnosti koja ima, ne samo tradicijska i kulturno-historijska obilježja, već i obilježja komplementarne djelatnosti turizmu, od koje se može i solidno živjeti – pa bi ga u ovom ili nekom sličnom obliku trebalo ponoviti

15. 4. 2010.

Naučni skup “Kulturno-historijsko i prirodno naslijeđe općine Banovići”

Organizatori skupa - Zavod za kulturno-historijsko i prirodno naslijeđe Tuzlanskog kantona i Općina Banovići uspjeli su okupiti dvadesetak istaknutih stručnjaka iz oblasti historiografije, geografije, etnologije i historije jezika, koji su sa raznih aspekata ukazali na bogatstvo kulturno-historijskog i prirodnog naslijeđa tog kraja, te naznačili pravce dalje aktivnosti na njegovoj revalorizaciji, korišćenju i zaštiti. Na početku skupa, direktor Zavoda za zaštitu kulturno-historijskog i prirodnog naslijeđa, gosp. Benjamin Bajraktarević je upoznao prisutne koje aktivnosti Zavod provodi na području Banovića, a potom su svoje teme, između ostalih, izložili: doc. dr. Bego Omerčević, doc. dr. Edin Mutapčić, doc. dr. Amira Hadžagić, doc. dr. Edin ramić, Dr.sc Izet Šabotić, prof. dr. Ibrahim Bušatlija, prof. dr. Salih Kulenović, doc. dr. Refik Bulić, doc. dr. Adnan Jahić, prof. Mina Kujović, prof. Munisa Softić, mr. sc. Nihad Džanić i dr. Na ovom skupu nastupila su i trojica istraživača iz Gračanice: dr. sc. Omer Hamzić (sa dvije teme: Političke prilike na području tuzlanskog sreza u periodu između dva svjetska rata, s posebnim osvrtom na Banoviće i Neke naznake o ekonomskom i političkom značaju izgradnje pruge Brčko – Banovići), mr. sc. Rusmir Djedović (tema “Dovišta i kulturna mjesta na području Banovića) i Edin Šaković, prof. (tema “Arheološka slika šire okoline Banovića).

19. 4. 2010.

“Kovan” iz Gračanice na svjetskom sajmu tehnologija u Hanoveru

Dok se još sređuju utisci sa gračaničkog sajma “Grapos-expo”, firma “Kovan”, kao jedna od najzapaženijih na tom sajmu, učestvuje sa svojim eko-pećima na Svjetskom sajmu tehnologija koji se od 19. do 23. aprila održava u njemačkom gradu Hanoveru. U organizaciji Vanjskotrgovinske komore BiH i podršku Švicarskog programa za promociju uvoza, na ovom renomiranom sajmu ove godine predstavlja se samo šest firmi iz Bosne i Hercegovine, među kojima se našao i “Kovan” sa svojim novim proizvodnim programom.

29. 4. 2010.

18. sjednica Općinskog vijeća: u centru pažnje izvještaji javnih zdravstvenih ustanova, izvještaj Doma zdravlja upućen na “doradu”

Početak sjednice, označila je rasprava o Nacrtu odluka o dodjeli općinskih priznanja u kojoj je konstatovano da je ove godine na raspisani poziv Komisiji za dodjelu odlikovanja, nagrada i drugih priznanja došlo jako malo prijedloga, pa je zaključeno da se primjedbe i sugestije u vezi sa predloženim kandidatima dostave Komisiji najkasnije do 15. 05. 2010. godine. Požnju zaslužuje i zaključak, po kojem je navedena komisija zadužena da otvori postupak za donošenje nove odluke o općinskim priznanjima kako bi se izbjegle dosadašnje slabosti u postupku predlaganja i rasprave o tim društvenim priznanjima i podigao ugled tih priznanja.

Dvije odluke – o promjeni statusa nepokretnosti u opštoj upotrebi i o davanju saglasnosti za prenos prava posjeda dvije parcele u Donjoj Orahovici sa Općine na Medžlis Islamske zajednice bez naknade.

Informacija o radu općinskog suda u Gračanici za 2009. godinu usvojena je uz zaključak (1) da Ministarstvo pravosuđa i uprave i Ministarstvo finansija Tuzlanskog kantona, planirajući sredstva u budžetu

Kantona, omogućuje povećanje broja sudija i službenika koji rade na izvršnom referatu u Općinskom sudu Gračanica i (2) da Općinski načelnik, uz saglasnost Ministarstvo pravosuđa i uprave TK omoguću prijem dva volontera, dipl. pravnika, koji bi volonterski rad obavljali u Općinskom sudu Gračanica u skladu sa Odlukom o obavljanju volonterskog rada nezaposlenih osoba visoke stručne sprema sa područje općine Gračanica ("Službeni glasnik Općine Gračanica", broj: 11/09 i 12/09).

Što se tiče izvještaja o radu i finansijском poslovanju javnih zdravstvenih ustanova u 2009. godini, koji se redovno podnose Općinskom vijeću, nakon obavljene rasprave, usvojeni su za "Opću bolnicu "Dr.Mustafa Beganović" i Gradsku apoteku, dok je izvještaj za Dom zdravlja vraćen na dopunu u dijelu koji se odnosi na finansijsko poslovanje (zahtjev je da se detaljnije prikažu podaci u dijelu rashoda, te da se dostavi i bilans stanja i uspjeha), koji treba dostaviti Općinskom vijeću na razmatranje, nakon njegovog razmatranja od strane Upravnog odbora. Informacija o stanju lokalnih i nerazvrstanih cesta na području općine Gračanica, iako dosta aktualna, usvojena je bez učesnika u diskusiji, dok je Informacija o stanju peradarstva na području općine Gračanica (nekada važnog privrednog resursa) usvojena uz zaključak da Služba za poduzetništvo, lokalni razvoj i finansije evidentira farme koje se bave peradarskom proizvodnjom na području naše općine i utvrdi njihov status u pogledu odgovarajuće registracije kod nadležnih organa. Na ovoj sjednici Vijeće je dalo saglasnost na statute mjesnih zajednica Trnovci i Škahovica.

Kako se Nacrt zakona o prostornom uređenju i građenju TK nalazi na javnoj raspravi, svojim zaključkom, Vijeće je zadužilo Službu za prostorno uređenje, geodetske i imovinsko-pravne poslove da zajedno sa Komisijom za urbanizam i ekologiju za narednu sjednicu Općinskog vi-

jeća pripremi primjedbe, prijedloge i sugestije na nacrt Zakona o prostornom uređenju i građenju kako bi iste bile razmatrane i dostavljene predlažu navedenog zakona.

Na kraju je prihvaćena Inicijativa za izmjene i dopune Odluke o visini naknade članovima Općinskog vijeća i članovima stalnih i povremenih radnih tijela, kojom se zadužuje Kolegij Općinskog vijeća i Komisija za izbor i imenovanje da pripreme prijedlog izmjena navedene odluke, kojima bi se sankcionisalo kašnjenje i prijevremeno napuštanje sjednica Općinskog vijeća. (Printtel)

4. 5. 2010.

"Bema ba" otvorila novi proizvodni pogon za prerađu plastičnih masa brizganjem, u Gračanici (lokacija Donja Lohinja, pored magistralnog puta)

Dugogodišnja saradnja između bosansko-hercegovačke firme "Ambra" (Gračanica) i holandske firme "Bema Kunststoffen" b.v. rezultirala je formiranjem zajedničke firme za prerađu plastičnih masa "Bema ba" d.o.o., u Gračanici s ciljem da se u potpunosti iskoristiti potencijal i dugogodišnje iskustvo u prerađi plastike koje ima "Ambra" i kvalitetna pozicija koju posjeduje "Bema Kunststoffen" na tržištu Zapadne Evrope. Prve poslovne korake zajednička firma je napravila u proizvodnim prostorima firme "Ambra", ali se brzo pokazalo da je za taj obim proizvodnje potreban veći proizvodni prostor i još savremenija oprema, pa je "Bema ba", 2008. godine počela izgradnju vlastitog proizvodnog objekta. Otvaranjem ovog proizvodnog pogona, površine oko 1.500 kvadratnih metara, u kojem posao dobiva desetak novih radnika, "Bema ba" je u stanju u potpunosti zadovoljiti najviše evropske standarde u oblasti prerade plastičnih proizvoda. Skoro 85% ukupnog prometa ova firma ostvaruje izvozom svojih proizvoda na tržište Europske Unije kao i zemalja regije. Zahvaljujući inovativnosti

kao razvojnom imperativu, izvozno tržište se konstantno povećava i postavlja nove zahtjeve i nove izazove menadžmentu firme. Čestitajući menadžmentu na skromnoj svečanosti, povodom otvaranja ovog proizvodnog pogona, općinski načelnik Nusret Helić je, između ostalog, rekako: “Nije li ovaj, da kažem perspektivan bosansko-holandski poslovni poduhvat–model za neke nove iskorake iz ovog našeg ekonomskog sivila. Drago mi je da te iskorake ovdje u Gračanici čini firma Nešada Šabića, čiji je otac Sejdo bio jedan od prvih privatnih biznismena u Gračanici i što gospodin Nešad na najbolji način nastavlja porodičnu tradiciju Šabića na području biznisa i poduzetništva.”

25. 5.2010.

Otkriveno Centralno spomen-obilježje poginulim borcima/šehidima i ubijenim civilima u odbrambeno-oslobodilačkom ratu, 1992. – 1995. , za općinu Gračanica

Bila je to dostojanstvena ceremonija, lišena nepotrebnog glamura i političkog kiča, bez ijedne suviše riječi ili geste. Pored članova porodica poginulih, čija su imena uklesana na spomeniku, ceremoniji su prisustvovali i mnogobrojni pripadnici boračkih organizacija, ratni komandanti, nosioci najviših ratnih priznanja, visoke ličnosti iz domaćeg političkog života, te mnogobrojni građani i omladina.

Na Spomen-obilježju ispisana su imena 326 poginulih boraca/šehida i 148 imena ubijenih civila. (opširniji prilog o Spomen-obilježju donosimo u rubrici “Građa” u ovom broju Časopisa)